

Roeghenj Iq Ciengqgo

Mungz Ningz/蒙宁

Ndaw ndoeng miz duz roeghenj iq ndeu. Roeghenj iq ciengqgo ndeidingq lai lo, singyaem lumj boq dig ityiengh, “yizyih, yizyih, yih, yih, yizyih——” Hoeng seizde ciengqgo, yaep ndeu diuq daengz gwnz go faex neix, yaep ndeu diuq daengz gwnz go faex haenx, cungj dwg ngaem gyaeuj. De gig launyaenq, lau vunzlai nyi gij singyaem ciengqgo de.

Seizcin daeuj lo, doenghduz ndaw ndoengfaex yaek hai aen hoihlienzyuen ndeu, daihgya naeuz roeghenj iq ciengqgo ndei lai lo, heuh noucoengz iq bae cingj roeghenj iq daeuj camgya. Noucoengz iq daeujdaengz ranz roeghenj iq, doiq roeghenj iq naeuz: “Roeghenj iq, ndaw ndoengfaex hai hoihlienzyuen, cingj mwngz bae ciengqgo!”

Roeghenj iq naeuz: “Gou mbouj bae law! Daihgya dingq gou ciengqgo, gou lau, gou mbouj bae.”

Daxmeh doiq roeghenj iq naeuz: “Gaej lau, daihgya gyaez dingq mwngz ciengqgo, mwngz couh wnggai ciengq hawj daihgya dingq ha. Bae ba, bae ba!” Roeghenj iq couh riengz noucoengz iq bae lo.

Hoihlienzyuen aen cezmuzyu ceiq doeklaeng, couhdwg roeghenj iq ciengqgo. Roeghenj iq diuq daengz gwnz daiz, yawjraen baenzlai doengzdoi h yawj de, roxnyinh gig lau, ndawsim baez vueng, singyaem hix saenz lo. De ngaem gyaeuj, “yizhih, yizhih” — Cij ciengq le geij coenz, couh caiq hix ciengq mbouj roengzbae lo, najhoengz le diuq daengz laeng daiz bae lo.

Roeghenj iq ndawsim gig nanzgvaq, hix mbouj caeuq doengzdoi h gangj “caiqraen”, couh mbin ma ranz. Youq gwnz loh, de bungzraen duzroeggeuq iq cabheiq, roeggeuq iq naeuz: “Roeghenj iq, mbei iq, ciengqgo ciengq buenq ndeu, lij ciengq mbouj ndei

dem.”

Roeghenj iq mbin dwk, mbin dwk, youh bungzraen duzroeggacak iq baklai, roeggacak naeuz: “Roeghenj iq, caen saetnaj, ciengqgo ciengq buenq ndeu, lij ciengq mbouj ndei dem.”

Roeghenj iq ma daengz ranz, doiq daxmeh naeuz: “Baezlaeng gou caiq hix mbouj ciengqgo lo.”

Daxmeh naeuz: “Vunz riu mwngz, dwg mwngz mbouj dingj roengzbae, mbouj dawz go ciengq sat. Mbouj youqgaenj, baezlaeng mwngz lai ciengq hawj vunz dingq, mbei couh menhmenh hung hwnjdaej.”

Roeghenj iq dingq gij vah daxmeh, ngoenzngoenz lienh ciengqgo.

Miz baez ndeu, roeghenj iq mbin hwnj gwnz gemh, yawjraen haujlai roeggeuq, couh youq baihnaj gyoengqde ciengqgo. Duzroeggeuq cabheiq naeuz: “Gaej ciengq lo, gou mbouj gyaez bouxcienqgo mbei iq.” Roeghenj iq mbouj leix de, ciengq ha, ciengq ha, yied ciengq mbei yied hung lo!

Youh baez ndeu, roeghenj iq mbin ok ndoengfaex, yawjraen haujlai roeggacak, couh youq baihnaj gyoengqde ciengqgo, duz roeggacak baklai haenx naeuz: “Roeghenj iq, gaej yienj lo, gou mbouj gyaez bouxyienj launyaenq.” Roeghenj iq mbouj leix de, ciengq ha, ciengq ha, yied ciengq yied ndeidingq.

Roeghenj iq youh mbin daengz baihnaj duzgoep caeuq roegdiuqmbwn bae ciengqgo, duzgoep caeuq roegdiuqmbwn dingq le, cungj haenx de: “Roeghenj iq mbei hung lo, ciengqgo engq ndeidingq lo, biujcingz hix gig ndei. Roeghenj iq cinbu vaiq lai bw!”

Seizhah daengz lo, ndaw ndoengfaex youh gawjhengz baez hoihlienzyuen ndeu, roeghenj iq hix



bae camgya. Roeggeuq iq caeuq roeggacak iq naeuz: “Roeghenj iq mbei iq, gaej hawj de ciengqgo.” Hoeng duzgoep caeuq roegdiuqmbwn cungj naeuz: “Roeghenj iq mbei hung lo, ciengqgo hix engq ndeidingq lo.”

Hoihlienzyuenh hainduzyu lo, roeghenj iq boux daih’it hwnj daiz yienj. Baezneix, ndawsim de di hix mbouj vueng, ciengq ndaej rwenzrwz ndeidingq. Daihgya cungj dopfwngz goksasa, roeggeuq iq cabheiq caeuq roeggacak iq baklai hix dopfwngz, lij dop ndaej daegbied yiengj ne!

Dahnuengx Dwgyaez Lai

Gou miz dahnuengx gyaez ning youh dwgyaez, coengmingz youh cabheiq ndeu.

De bineix ndaej sam bi. Louz byoem dinjdet, song aen lwgda ronghliklik, aenbak iquet, doiq rwz couh lumj gyaujswj iquet nei. De miz seiz hawj vunz maij, miz seiz hawj vunz dwgcaengz, danhseih gou caeklaiq miz dahnuengx baenzneix ndeu.

Hawj vunz raen dwgyaez seiz, de dingq gou gangj dahraix. Gou baez heuh de couh gvaqdaej, couh lumj “nonnemlaeng” gou, neix gou couh simangq lai. Miz haemh ndeu, daxmeh caeuq daxboh bae danhvei gyaban, ndaw ranz cij miz gou caeuq dahnuengx, gou sij cozyez liux le, caeuq dahnuengx youq gyang dingranz loengh sa guhcaemz, gou heuh de guh maz, de couh guh maz, dou guhcaemz ndaej angq baenzmaz bae.

Hawj vunz raen dwgcaengz seiz, de hawj vunz simfanz dahraix. Miz baez ndeu, gou cingq sij cozyez, mwh bae cwzsoj dauqdaej, raen dahnuengx cingq bin youq gwnz daiz, dawz bit youq gwnz bonjcozyez gou veh haujlai aen’gvaengz caeuq diuzsienq. Gou



simgip lo, dub de mbat ndeu, de mbouj haengj lo, couh gyaep gou dub gou. Gou fatheiq le mbouj leix de lo.

Yienznaeuz dahnuengx mizseiz cabheiq, danhseih gij yienghsiengq gvaizlingz dwgyaez haenx couh lumj bouxdensij ndeu, hawj vunz ndaw ranz dou sim’angq lai.

Gou gyaez dahnuengx gou.

(Couh Swjhanz)

Duzroegiq



Beixmbauq ha, mwngz laihnaeuz duzroeg iq ndaw roengq cingq guhfwen ma? De cingq daejnga’nga siliengz lai go.

Beixmbauq ha, langhnaeuz mwngz goj dwg duzroeg iq, dwg duzroeg iq gyaez guhfwen ndeu; langhnaeuz mwngz goj deng vunz gaeb daeuj gyaeng youq ndaw roengq, mbouj ndaej mbinfiufiu youq gyangmbwn angqfwngfwng nauq, mbouj ndaej youq ndaw ndoengfaex guhcaemz angqvauvau nauq, mwngz lij angqfaengz lwi? Mwngz lij eu ndaej ok fwen angqfaengz lwi?

Beixmbauq ha, hawj duzroeg iq youq ndaw ndoengfaex gwnz ndoibya guhfwen angqvauvau, mbouj ndei ma? Vihmaz gaeb duzroeg iq daeuj gyaeng haeuj ndaw roengq iqiq neix bae ne? Vihmaz mwngz hawj duzroeg iq daejnga’nga siliengz baenzneix ne?

(Daj 《Bonjsei Sim Lwgnyez》 (Veiz Gizlinz raiz) senj okdaej, Lwgfwngzmeh/卢奋长 hoiz)

